

清·方略館 編

清代 方略 全書

北京圖書館出版社



清代方略全書

四六

清·方略館編

北京圖書館出版社

欽定平苗紀略卷十八

上諭七月初一日

庚戌

興肇奏言

臣

於六月十二日領

兵二千名自辰州起程至瀘溪縣境總兵袁敏
已帶兵在彼防守總兵馬瑀亦在辰谿安設營
壘自辰谿縣李家坪至岩門一帶或十里五六
里不等皆設有大小營寨隨飭令弁兵嚴密防
守行至濫泥高村地方查看形勢詢問該處官

吏據稱賊自五月侵擾後迄今甚爲寧謐居民
已漸次復業但濫泥岩門實係後路緊要臣卽
將所帶兵一千分屯濫泥岩門兩處其一千名
卽帶至鎮筵與觀成福寧會晤商酌在城外各
山梁分營駐劄防守奏入

上諭軍機大臣曰興肇身爲將軍帶領滿兵二千名
前往鎮筵兵力不爲不多儘敷沿途剿捕之用其

所經高村濫泥巖門一帶皆係賊匪窺伺劫掠之處該將軍自當沿途探勦乃並未勦殺一賊及旣抵鎮筵於如何商量勦捕進攻之處亦無一字奏及止將帶到之兵安駐城外殊不可解鎮筵城外前此賊首吳半生曾到彼滋擾今賊匪竄回月餘則駐兵何用豈爲坐守空城而設其巖門濫泥等處民情安貼則後起滿兵一千名又何必再駐該

處豈非以有用之兵徒置無用之地著傳旨嚴行
申飭並著傳諭該將軍等務宜共知愧悔奮勉勦
賊毋再遷延遲悞致干重戾再福康安等自破黃
瓜寨後一到大烏草河見河流險阻賊人拚命拒
守兵力不敷攻勦卽當星速添調方爲得濟乃又
閱多日始行檄調雲貴四川官兵雖所調之兵俱
係附近營分但究不能朝發夕至大烏草河雖屬

險阻自當另覓間道或於上下游設伏誘賊使之
首尾不相接應官兵趨勢遶過以爲暗度陳倉之
計若坐守待渡則現有之兵不能設法迅濟豈添
兵之後遂能飛渡耶現在鎮筵駐守之福寧等及
此外帶兵分駐各提鎮將領皆止知自守不能分
勦進攻全仗福康安和琳統兵勦捕若福康安等
不獲尅期進攻則日復一日衆志或致懈緩所關

非細此旨到時福康安等或已攻破賊巢擒獲首
逆停止續調各兵實所深願伊二人務當堅持定
見鼓勵將士以期迅速藏功再瀘溪辰谿月餘以
來並未聞有賊匪滋擾之事何必派令總兵大員
帶兵駐守福康安等與其於遠處調兵等候需時
何不就近抽撥更爲便捷但袁敏等是否可以調
動朕亦難以懸揣著交與福康安等酌量辦理至

吳半生既可由賊巢遠赴鎮筵則我兵即可從此
路躡蹤追捕與福康安和琳會合兩面夾攻目下
鎮筵無事亦無須多兵防守朕意興肇所帶後起
滿兵儘可供勦捕之用卽先到之滿兵一千亦可
抽撥數百名應用或交與觀成蘇靈帶領由南而
北直搗賊巢與福康安和琳會合使賊腹背受敵
尤易成擒倘觀成等不能得力德楞泰前在濫泥

高村一帶往來督察駐劄日久情形較熟或令德
楞泰仍回鎮寧會同觀成等協力勦捕亦屬出奇
制勝之法

同日

上諭內閣曰前此觀成由正大營前往鎮寧帶兵本
屬有限尚可云不敷勦捕至興肇帶兵二千名之
多自當沿途留心偵訪探明賊蹤就近勦殺以期

廓清後路再赴鎮筵會同觀成福寧趕緊攻捕附近賊匪方爲無負任使力途次並未與賊打仗自係避道潛行及到鎮筵又復漫無調度僅將帶往之兵分駐城外而於如何商辦剿賊情形竟無一字奏及興肇人本老實無能前因帶兵行走迅速尚復加之獎賞今不料其糊塗一至於此至福寧自抵鎮筵以後因循畏葸一籌莫展近日賊匪因

福康安和琳統領大兵痛加殲戮直壓巢穴勢窮
力蹙分其黨與潛赴鎮筵以爲牽掣大兵苟延殘
喘之計福寧遂心懷畏懼檄調滿兵二千名前往
追兵旣到彼自應趕緊籌畫進攻乃亦無一言入
奏則檄調滿兵何用豈專爲護衛伊等坐守空城
而設耶興肇等俱係滿洲將軍總督似此庸懦無
能朕之用人不當惟有引以自愧興肇福寧俱著

交部嚴加議處

初三日壬子畢沅姜晟奏言臣等自抵辰以來留

心體察苗情節次專差深入各寨曉以大義俾

其轉相告語革面洗心三月以來歸誠甚衆前

派水順協副將慶溥駐劄新寨示以兵威并屬

隨時安輯設法曉諭並令前次來降之上官壩

苗人龍興周前往探訪嗣據稟報五月二十一

日苗寨頭人石大貴遣人隨同龍興周來營具稟情願帶領附近永順保靖及乾州西北境之六十八寨苗人全行効順臣等卽諭以該苗等如果真心歸順必須各寨頭人親自到郡面訊真僞再行酌辦旋於六月十二日副將慶溥帶領該苗石大貴並永順之二十三寨保靖之三十七寨乾州西北境之八寨各頭人前來臣等

逐一嚴詰以爾等既有投誠之意何不及早出來直到今日大兵雲集方來乞命據供我們一寨之中賢愚不等有一種無業苗匪寨中稱爲痞棍與逆苗通氣每寨或三四人五六人不等我們但有舉動他便去糾約逆苗前來焚殺良苗各惜身家未免瞻顧今旣歸命投誠已與各寨互相糾合責成各頭人鈐束各寨痞棍如或

再有滋事卽行拿獲送究一面自行團練各守
各寨抵禦附近永綏一帶逆苗以俟大兵進剿
稍伸報効等語臣等細察情詞尚屬懇切且石
大貴龍興周等人尚明白才具可用其隨來各
寨苗人亦俱聽其指使似宜設法羈縻以觀後
効當卽反復訓飭以爾等果係安分良苗各宜
激發天良出力報効凡倡亂逆苗罪在不赦爾

等若能率領族黨隨同官兵攻剿固爲上策卽各自約束由人不令再出滋事附和兇苗亦屬保守身家之至計均宜妥速料理以見投順真心如果著有成效當卽奏明

皇上從優犒賞隨卽給以銀牌花紅綢布該頭人等均卽歡欣鼓舞而去嗣據辰屬歐溪草潭守卡將弁具報探聞前月有逆苗向蕩它借路潛出